

# Cumbatter insembel per l'avegnir da la regiun

**MiaEngiadina ha fat müdada a Scuol. In occasiun da la Festa sül Stradun sun gnüdas preschantadas las novas localitats da coworking sül Stradun. Preschaints d'eiran eir differents candidats pel Cussagl naziunal. Dürant il podium han els tscherchè ün böt cumünaivel per cumbatter e collavurar.**

NICOLO BASS

In occasiun da la Festa sül Stradun ha gnü lö in sonda passada eir l'avertüra da las novas localitats da büro e coworking da miaEngiadina sül Stradun 400A a Scuol, directamaing sur l'agentura Mobilier. Dürant tuotta di han interessats pudü visitar il nouv Mountain Hub ed imprender a cugnoscher la sporta. La sporta es restada plü o main eguala sco fin uossa: Minchün ha la pussibilità da dovrar l'infrastructura per lavurar, per reticular e per trar a nüz sinergias, ed impustüt per profitar da las lingias sveltas d'internet. Oter co fin uossa spordschan las novas localitats eir ün büro per lavurar in silenzi e concentrada maing. Profitar po minchün, independent sch'el es commember da miaEngiadina o brich. «Ils commembers profitan da pudair dovrar l'infrastructura quatter mez dis als mais gratuit», ha in fuorma l'iniziant da miaEngiadina Jon Erni d'ürant l'avertüra als preschaints. Intant dombra miaEngiadina fingà raduond 700 commembers.

## Discussiun da podium

In seguit a l'avertüra ha miaEngiadina organisà ün arrandschamaint da podium a regard l'avegnir da l'Engiadina. Suot il titel «Inavant Engiadina» han differents candidats pel Cussagl naziunal preschantà lur prioritats pella lavur a Berna. Preschaints sun stats: Stefan Engler (pcd, cusglier dal stadi), Heinz Brand (pps, cusglier naziunal) e Duri Campell (pbd, cusglier naziunal). Implü sun gnüts a pled a l'arrandschamaint per giasts invidats: Franziska Preisig (ps, grond cusgliera da Samedan), Carmelia Maissen (pcd, grond cusgliera e presidenta cumünala da Glion), e finalmaing Andreas Züllig (pld,

president Hotelleriesuisse). La discussiun da podium es gnüda moderada da Jon Erni. El ha chattà üna via na propcha üsitada pella discussiun: Invezza da laschar bombardar ils cliaints cun pretais ed imbüttamaints da dretta a schneistra ed inavo, ha vulgü chattar il moderatur Jon Erni il consens. Il motto es stat da chattar ün böt cumünaivel per collavurar e cumbatter insembel a Berna per l'avegnir ed il svilup da las regiuns muntagnardas.

## Minchün sias prioritats

Ils ses candidats chi s'han preschantats a Scuol han minchün seis program e sias prioritats persunalas. Ils cusgliers naziunals Duri Campell e Heinz Brandt,

sco eir il cusglier dal stadi Stefan Engler, vöglan cuntinuar lur via e profitar da lur reticulaziun e da lur contacts. Ils trais candidats novs Franziska Preisig, Carmelia Maissen ed Andreas Züllig vöglan fichar pè a Berna, portar nouv vent ed esser part da la politica federala. Cha la digitalisaziun stopcha gnir realisada eir illas regiuns periferas, sun tuots daperüna. Cha miaEngiadina fetscha in quist regard üna lavur da pionier, es il tenor da tuot ils candidats. Ün fat es però eir, cha la digitalisaziun sco tala nu polarisescha. Cha quella vain pretaisa da minchün e da mincha posiziun politica. Cha la basa da la digitalisaziun saja il proget d'infrastructura. Cha fich important saja, da trar a nüz l'infra-

structura e d'implir quella cun progets innovativs sco cuntgnü.

## Chattar il consens per cumbatter

Ils ses partecipants han chattà bainsvelt differents temas, ingio chi vala la paina d'unir las forzas e da cumbatter insembel per l'avegnir da l'Engiadina e tuot las regiuns da muntogna. Concret es gnü manzunà il cumbat pels fits d'aua. Oters progets uschè concrets mancaivan e la discussiun es gnüda fatta impustüt sün basa da temas. Natüra intacta, persistenza, il müdamaint dal clima e cultura sun stats ils plects clav. Ils partecipants han constatà cha in avegnir nu dessa dar be agricultura e turissem in Engiadina, dimpersè dessan

dvantar eir oters spazis economica maing importants, nempe la cultura e la fuormaziun e perscrutaziun. Dalönch innan es passà il temp cha cultura es be ün aspet da passa temp. Ils candidats pel Cussagl naziunal sun persvas cha cultura ha ün effet economic e cha'ls giasts vegnan bel ed aposta causa las spüertas culturalas illa regiun. Cha eir la perscrutaziun da la natüra e da la cultura haja ün grond potenzial illa regiun. Cha culla basa digitala innovativa e culs pilasters da fuormaziun e perscrutaziun, da cultura, da turissem, da sandà, d'agricultura e tuot quai eir grazcha a la natüra intacta ed unica haja l'Engiadina bunas schanzas da dvantar üna regiun attractiva per viver e lavurar.



Ils candidats pel Cussagl naziunal e pel Cussagl dal stadi han chattà ün consens per cumbatter a Berna. Da schneistra: Heinz Brand, Carmelia Maissen, Stefan Engler, Andreas Züllig, Franziska Preisig, Duri Campell e'l moderatur Jon Erni. fotografia: Mayk Wendt/miaEngiadina

# Inscunter da giasts, indigens e d'indigens chi abitan utro

**Sonda passada es stat serrà il Stradun a Scuol pel trafic dad autos e reservà per inscunters cun exposiziuns da prodots, cun musica ed ustarias da festa. Ün evenimaint chi ha laschà invlidar il minchadi ed ha pisserà per bels mumaints in ün ambiant simpatic.**

La 22avla Festa dal Stradun a Scuol es ün evenimaint chi nu dascha mancar i'l program da stà da la regiun d'Engiadina Bassa. La sporta es fich gronda e minchün chatta seis möd da giodair ün di da cumpagnia, vuol dir üna festa cun ün'atmosfera da marchà cun musica live e cun mangiar e baiver suot tschèl avert. Eir quist on d'eira il Stradun serrà da venderdi saira fin dumengia avantmezdi pel trafic da veucils e liber per glied cun buna glüna. La festa d'eira organisada davent dal Cafè Cantieni al vest e fin pro la Chasa Paradis al ost dal cumün. Da tuottas duos varts da la via d'eiran exposts prodots da tuot gener sco büschmainta, prodots fats a man,

specialitats indigenas ed ulteriuras atracziuns per pitschen e grond. Implü d'eira eir pisserà per tratagnimaint musical cun ustarias da festa. Giasts chi frequaintan fingià divers ons lur vacanzas illa regiun s'allegran d'inscuntar cuntschaints, paraints ed indigens. Glied chi'd es ida insembel a scoula in Engiadina Bassa ed abita sparpaglià in tuot la Svizra ed eir d'utro s'han vis davo lung temp darcheu üna jada ed ha gnü bler da quintar. Davo ün bun süerv es minchün darcheu i sia via e davo a chasa cun ün cour impli d'algoranzas e d'evenimaints chi nu tuorman per part plü. Affarists ed exposituors han survgni üna pussibilità daplü per preschantar lur schelta e per gnir in contact cun lur cliantella.

## Buna collavuraziun

Urs Lechthaler es il «Mister Stradun» ed organisescha insembel cun var sesanta exposituors, sponsuors e partecipants la festa tradiziunala: «Ils exposituors pagan üna pauschala per lur stands e l'organisaziun turistica, la TESSVM, pissera per la reclama, nun es però directamaing partecipada», ha declerà Lechthaler. La finanziaziun da la Festa sül Stradun es gnüda procurada da la man-



Var 5000 personas han visità la Festa sül Stradun a Scuol.

fotografia: Benedict Stecher

steranza indigena, da l'hotellaria, dals proprietaris da restorants e dals exponents. Raduond 60 dittas han sustgnü l'evenimaint cun donaziuns generusas e garantischan cun quai il futur da la festa. Suot il motto insembel eschan fermas ha funcziunà l'organisaziun fich bain. «Eir culla pulizia e cul cumün es la collavuraziun fich buna. La pulizia rumischa las piazzas da parcar pro'l Stradun e svia il trafic. Daspö cha la via per ir a Sent nu va

plü tras il cumün da Scuol es dvantà tuot bler plü simpel», ha dit Lechthaler. Per quist on chi vain esa previs da far ün pitschen «Open Air».

## Eir üna festa per uffants

Tenor ils organisatuors d'eiran sonda passada preschaintas var 5000 personas a la Festa dal Stradun. Ils uffants nu sun gnüts a la cuorta. Sco fingià ils ultims ons d'eira eir quista jada preschaint il

clown «Stauni». El ha dalettà ils uffants ma eir als creschüts cun seis trics e cun seis striöm chi ha lascha star a bliers culla bocca averta. Implü d'eiran tanter oter installats carussels da chavals, la fortezza per saglir, trar cul schluppet, üna pista per autoins e bler oter plü. Quels chi nu d'eiran preschaints han mancantà alch ed uschè as poja be dir eviva la Festa dal Stradun, forsa in futur in ün'otra fuorma. (anr/bcs)